

允○慶尚道金山郡地震○戊辰諫院啓任弼亨事依允○憲  
府啓曰近來守令等或憚路遠或厭殘弊如有窺免之心則假  
托身病期於必遞弊習已成勢將難救前穩城府使邊明胤為  
判官四年驟陞堂上至為濫矣而猶不戒懼托病呈辭謀避路  
遠殘弊之邑觀察使拘於人情不察病之輕重遽啓本差物情  
未便邊明胤請推考治罪觀察使金鉉請並推考荅曰邊明胤  
事所啓弊習已成勢將難救之言至當與金鉉皆依啓推之○  
慶尚道禮安縣地震○己巳 御晝講○日暈兩珥重暈夜坤  
方有氣如火○庚午領議政尹啟輔等啓曰竊見觀象監所報  
東宮造成年月則今年非但不吉亦有凶害不合營造且大歲  
在卯開基正占其位雖只見東宮吉凶亦既如是况在私家猶  
先察一家之長禁忌有無然後為之宮闕亦豈異哉逐日列書  
見之至為未安何必於今年為之徐待吉運何如荅曰啓意知  
道○日暈冠○辛未 御夕講○憲府啓司膽寺副正安休年  
老衰耗布貨出納之際決不能堪任請遞本寺所納各官布物